

深念道修齋遠於災殃消除魔魅當以降生之日默念至親生我之恩精勤齋戒廣修衆善以報劬勞如是等人修持如上免墮幽塗生於正覺汝當遵奉宣布教化持此經典周今誇壽生不信想獲罪无量爾時上智及諸天衆既聞是語歡喜踊躍言我等衆若遇是人皆當擁護得受快樂瞻仰无已而說頌曰大慈无上尊 衆生真父母 能說報恩經 聞者皆開悟 有人精受持 不爰登仙路 略讚一毫端 稽首天尊去

太上真一報父母恩重經

元始洞真慈善孝子報恩成道經

道言左右中真結形之始分於元始无上大道應化之氣孕靈瓊胎九萬大劫幽闇寥寂九萬劫後法當應世結形理氣出於瓊胎出胎之時九天雷震九地開裂舉步之初登天寶華身出金光猶如初日二晨扶照晶彩朗耀眸有斗心星前日象綠髮斷齒紫氣連霄所在之處七素之雲晨夕陰蓋隱龍負蓮以爲林產天燈天燭照明雲路天樂天梵萬音齊鼓龍鳳撫節誦歌太平邑邑和雅非可名目甘泉甘井飲之愈疾形如金玉无有衰老无爲和化經九萬劫爾時三真化作嬰童託附真母以漸長大隨世成立无上大道元始天尊授此三真號曰至孝真玉治化中國傍攝四夷有生之類咸來受事教其慈孝敬天順地守一寶形憐憫萬物三千百年後又更改新所謂淘汰滓穢水大治鍊是時三真孝王一治日中二治月中三治斗中上持三晨晶耀幽玄治三氣冥適空有應變修慈不待呼召如形出影不由憶想

雖處上界道適下土无上无下无遠无際隨方設教友諸異類與其同好心无疑悞孝心高遠神力无比迴天轉地制御陰陽賒促運度驅役千靈感動祥瑞无翼而飛瞬息九萬屈伸之頃已周萬天皆由至孝慈順二親憐愍一切動植之類孝道慈善好生惡殺食肉飲酒非孝道也男女穢慢非孝道也胎產屍敗非孝道也毀傷流血非孝道也偷劫竊盜非孝道也好習不善講論惡事非孝道也樂處穢賤內外流汗心形踈懶不修生道信心不篤輕浮彼好隨事故遂守一不專心氣離散生老病死種種煩惱死入地獄窮劫受苦永无出期无善因緣失吾孝道得種種苦下世男女修吾孝道與道同德既同德已與道同光既同光已與道同真既同真已與道同身既同身已與道同神既同神已與道同變既同變已與道同壽既同壽已與道同有既同有已與道同无既同无已无處不无无處不无亦无處不有有無處不有寂寥虛豁无處不无隨心應變或爲帝王或爲忠臣或爲賢

人或為孝子或為道士或為國師或種寒林
 清齋苦行誦經念道立功立德或為良將不
 戰而勝或積穀帛濟惠飢寒或作明師除諸
 疾疫種種利益一切生有或不燈燭照明積
 夜或促萬劫以為一劫或延一劫以為百劫
 或一毫端而勝大地或一毛孔盛九大河及
 以四海不撓物性不覺不知或引十方世界
 勝一針鋒米對目前有生之類皆見三真光
 氣法身種種說法各得悟解奉吾孝道能入
 不可思議處能為不可思議事失吾孝道救
 苦不暇生死相續不可思議奉吾孝道得无
 畏果第一離生死怖畏得不生死果第二離
 暗障怖畏得光明果晝明神光夜照天燈久
 則身光无晝无夜第三離飢寒怖畏得天厨
 天衣果第四離眾試怖畏一切魔王及諸猛
 獸皆來受事而為侍衛第五離有形怖畏得
 入无形果入无形果者非滅非生而无形相
 即此凡身得成道身身同光氣昇入无形同
 於虚空是故謂之得无形果高下自任聚散
 隨心有无在意不待身心而所為也孝治天

下不勞法今孝治其身志性堅正孝治百病
 天為醫之孝治萬物眾毒不害孝治山川草
 木不枯孝營生業田蠶萬倍孝至於天風雨
 以時孝至於地萬類安靜神芝靈木處處呈
 瑞孝至禽獸龍麟鸞鳳翔集境內孝至淵澤
 河侯獻珠魚龍踊躍靜息波浪但孝二親元
 元大恩天地萬靈晨夕侍衛行道守一自然
 得道孝道至大與无並生治於三光照耀幽
 夜有生之類侍賴无窮爾時靈童稽首敢問
 天尊下世世人多有不幸早喪二親孝心何
 申於是
 天尊答曰敬天順地朝禮三光如孝父母无
 有異也成道益速所願從心又順地者順於
 王氣朝禮五嶽大小便利不忤太歲順於四
 時修日新道朝於八節請生謝罪內外芳潔
 披心露膽心香自熏洗滌荒穢精而復精猶
 嫌不精真而彌真猶嫌不真不真為真求吾
 真道邪魅應之卒至退敗生入邪道魂魄被
 繫顛狂感亂自製一法敗贖道要以求利用
 賊滿罪積生身被考種種苦惱死入地獄遍

遭湯炭永无出期縱得出世生墮六畜不如
 意中或生下賤盲聾瘖瘓手足不具永不見
 道求不聞法為諸人畜之所擯役飢寒困苦
 性命危脆一失大道長淪惡趣不可思議
 道言有德之人孝心高遠道合天地故天不
 能殺道不可滅故地不能埋如理瓊霜終成
 金寶不可毀壞上天入地无所滯礙往昔有
 人不誠大道貪生長死晨夕正念朝禮枯樹
 以求不死積四十年大道慙之勤苦不懈求
 其道氣如是枯樹一旦榮華此人歡喜彌加
 精進採服其華身遂得道得道之士取於不
 懈積功累德心行日新神燈神香神光神通
 是道之信其志不已道來降之教其真要定
 不虛也
 道言下世邪俗觀道幽驗因以求用規他施
 財入已私費為邪所中終不得道慳貪不捨
 失慈悲道无孝順心為利奉道蓋其詐偽詐
 偽之罪天地不赦學道之士莫與共處應須
 詞責舉其過咎擯出治罪勿許詐悔更次道
 流收其贓賄以給貧病不得穢財以營神功

道言孝治堂宇粧嚴精舍凡今穿敗流俗士
女卑賤熏臭瘡疥垢穢酒色喪產食啖魚肉
茹葷辛者永絕彼往勿相親近勿履齋廚
道言復有十惡五逆不孝陰賊誹謗毀譽破
敗善道嫉妬傲慢貪嗔嗜酒好啖魚肉田獵
捕殺偷盜劫賊違奉邪道心无慈孝志不平
等捨貧親富喜好朝調情愛戰鬪習畜器仗
无忍辱心利己傷物孝道所忌人畜所畏不
合閭道應須遠避勿相親近
无上大道說此教戒爲下世明王孝治天下
爲諸孝子報父母恩就則家國使天下太平
八表歸一咸遵至孝有得之者晨夕誦持不
擇男女无論貴賤皆令習誦以答二親元元
大恩說此經時天現神燈處處明朝天鐘天
聲天歌天樂空中自鼓天香天華隨風流轉
家國人人供養是經思其義趣奉行其事傍
勸木闡有用之者應精紙筆疏潔潔沐焚香
抄寫百卷千卷流通供養香燈不絕心无懈
倦必得成道不可思議
元始洞真慈善孝子報恩成道經

太上元始天尊說消殄蟲蝗經

爾時

元始天尊在大羅天上玉京山中爲諸大衆
廣宣妙法時有太極真人長跪端簡上白
天尊言曰伏見天下人民耕桑爲本養育身

形須藉田蠶近代以來蟲蝗競起水旱不調
侵損苗稼天下萬民惶惶憂懼男女悲哀无
處祈禱人民躬詣名山祭拜全无所應蟲蝗
不滅雨澤未期不知凡夫積何罪業所以无
應惟願

天尊特賜開悟天尊曰吾見天下人民每年
豐熟之時全无敬信不荷三光將其穀米賤
慢雜踏狗踐拋散糞穢非爲使用並无護惜
皆是乾象觀見天下人民不生敬信致令蟲
蝗水旱所見如斯今得真人所奏吾甚欣然
謹遣五帝大魔三元官屬六甲神將五嶽四
瀆風伯雨師雷公電母二十四炁神君洞府
名山八大龍王五穀精靈一切龍神令於下
界收攝蟲蝗使風調雨順天下萬民改惡從
善宜於宮觀靈壇仙境洞府之中建立道場

安排真像或一日二日乃至七日齊心精潔
燒諸名香行道念誦經文設齋醮祭上告乾
象星宿神作大福利乃得蟲蝗消殄雨順
風調五穀秀成倉庫盈滿人民歡樂國土太
平衣食自然

天尊乃說偈曰

人生不積善 災厄所來侵 耕種不專勤
蟲蝗水旱臨 杳冥難可測 恍惚不知尋
人生若敬重 萬禍不來侵 衆生行慈孝
天然福果因 如斯敬大道 歲歲保豐登
天尊說是頌畢及諸大衆太極真人等一切
稽首歡喜踊躍作禮而退信受奉行

太上元始天尊說消殄蟲蝗經